



Broj:KSI-09-68/23
Datum: 14.04.2023. godine

Na osnovu člana 25. tačka g) Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta BiH“ broj:04/21) i člana 25. stav (2) Poslovnika o radu Komisije za odlučivanje o sukobu interesa („Službeni glasnik Brčko distrikta BiH“ broj 19/21), Komisija za odlučivanje o sukobu interesa, postupajući po anonimnoj prijavi od 30.03.2023. godine protiv I. G., pravobranioca u Pravobranilaštvu Brčko distrikta Bosne i Hercegovine na 52. sjednici, održanoj dana 14.04.2023. godine, donosi

O D L U K U

Postupak za odlučivanje o sukobu interesa protiv I. G., pravobranioca u Pravobranilaštvu Brčko distrikta Bosne i Hercegovine, kao nosioca javne funkcije neće se pokrenuti, obzirom da iz prikupljenih podataka i dokumentacije ne proizilazi da je u postupanju nosioca javne funkcije došlo do povrede odredaba Zakona o sprečavanju sukoba interesa u institucijama Brčko distrikta BiH u smislu nespojivosti.

Образложење

Komisija je dana 30.03.2023. godine pod brojem: KSI-09-68/23 zaprimila anonimnu prijavu protiv I. G., pravobranioca u Pravobranilaštvu Brčko distrikta Bosne i Hercegovine, kao nosioca javne funkcije radi sumnje na postojanje povreda odredaba Zakona o sprečavanju sukoba interesa u institucijama Brčko distrikta Bosne i Hercegovine.

U predmetnoj prijavi se navodi da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine u smislu nespojivosti funkcija jer I. G. obavlja javnu funkciju glavnog pravobranioca u Pravobranilaštvu Brčko distrikta Bosne i Hercegovine, dok istovremeno javnu funkciju obavlja i član uže porodice, odnosno suprug T. G., član Izborne komisije Brčko distrikta Bosne i Hercegovine. S tim u vezi, podnosilac anonimne prijave od Komisije za odlučivanje o sukobu interesa traži da utvrdi sve relevantne činjenice i ukoliko se utvrdi postojanje nespojivosti primjene mjere i eventualno sankcije prema navedenom nosiocu javne funkcije.

Članom 2. tačka c) Zakona o sprečavanju sukoba interesa u institucijama Brčko distrikta BiH propisano je da je nosilac javne funkcije izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnih ovlaštenja i lice koje je imenovano, odnosno

na čiji izbor i imenovanje saglasnost daje Skupština, odnosno Vlada, ukoliko drugim zakonom nije drugačije propisano.

Komisija je uvidom u Registar javnih funkcija i nosilaca javnih funkcija utvrdila da I. G. obavlja funkciju pravobranioca u Pravobranilaštvu Brčko distrikta Bosne i Hercegovine, odlukom Pravosudne komisije Brčko distrikta Bosne i Hercegovine, broj:SuPK-1443/19 od 02.09.2019. godine, i da T. G. obavlja funkciju člana Izborne komisije Brčko distrikta Bosne i Hercegovine, odlukom Skupštine Brčko distrikta Bosne i Hercegovine, broj:01-02-56/17 od 01.02.2017. godine, a na čiji izbor je Centralna Izborna komisija Bosne i Hercegovine dala suglasnost Rješenjem broj:06-1-07-1-22/17 od 21.02.2017. godine.

Obzirom na navedeno, I. G. i T. G. kao nosioci javne funkcije obavezani su postupati u skladu s odredbama Zakona o sprečavanju sukoba interesa u institucijama Brčko distrikta BiH.

Članom 2. tačka f) Zakona o sprečavanju sukoba interesa u institucijama Brčko distrikta BiH propisano je da su „članovi uže porodice“ bračni i vanbračni drug, usvojitelj, usvojenik, dijete, majka i otac nosioca javne funkcije, odnosno lice prema kome nosilac javne funkcije ima zakonsku obavezu izdržavanja.

Uvidom u Izvod iz matične knjige vjenčanih [REDACTED] godine utvrđeno je da su dana 28.08.1982. godine T. G. i I. G. zaključili brak u Brčkom, odnosno utvrđeno je da su prema gore navedenoj odredbi članovi uže porodice.

Članom 2. tačka l) Zakona o sprečavanju sukoba interesa u institucijama Brčko distrikta BiH propisano je da je „pravno lice koje je osnovao Distrikt“ javno preduzeće, javna ustanova, fond, zavod i svako drugo pravno lice koje je osnovao Distrikt u skladu sa zakonom, dok je tačkom m) propisano da su „organi i institucije Distrikta“ organi i institucije propisani Statutom Brčko distrikta Bosne i Hercegovine i zakonima Distrikta.

Izbornim zakonom Brčko distrikta Bosne i Hercegovine članom 2.1 stav (1) propisano je da je Izborna komisija Distrikta organ nadležan za sprovođenje izbora.

Članom 5. stav (1) Zakona o sprečavanju sukoba interesa u institucijama Brčko distrikta BiH propisano je da nosilac javne funkcije obavlja samo jednu javnu funkcije.

Nadalje, istim članom stavom (5) propisano je da članstvo u organima upravljanja, nadzora i rukovođenja u pravnim licima koja su osnovana od strane organa i institucija na bilo kojem nivou vlasti u BiH, nespojivo je sa obavljanjem javne funkcije, dok je stavom (8) istog člana propisano da je obavljanje javne funkcije nespojivo ako je član uže porodice nosioca javne funkcije član organa iz stava (5) ovog člana.

Na osnovu prikupljenih podataka i dokumentacije, Komisija za odlučivanje o sukobu interesa utvrdila je da I. G., pravobranilac u Pravobranilaštvu Brčko distrikta Bosne i Hercegovine, kao nosilac javne funkcije nije u sukobu interesa, odnosno u istovremenom obavljanju javne funkcije I. G., pravobranilac u Pravobranilaštvu Brčko distrikta Bosne i Hercegovine i T. G., bračnog druga nosioca javne funkcije, člana Izborne Komisije Brčko distrikta Bosne i Hercegovine, ne postoje povrede odredaba Zakona o sprečavanju sukoba interesa u institucijama Brčko distrikta BiH u smislu nespojivosti funkcija.

Naime, nesporno je da su I. G. kao pravobranilac u Pravobranilaštvu Brčko distrikta Bosne i Hercegovine i T. G. kao član Izborne komisije Brčko distrikta Bosne i Hercegovine nosioci javne funkcije u skladu sa odredbama Zakona o sprečavanju sukoba

interesa u institucijama Brčko distrikta Bosne i Hercegovine, odnosno da su izabrana lica u organima i institucijama distrikta. Međutim, T. G., kao nosilac javne funkcije nije član organa upravljanja, nadzora i rukovođenja u pravnim licima osnovanim od strane organa i institucija na bilo kojem nivou vlasti u BiH, jer je Izborna Komisija Brčko distrikta Bosne i Hercegovine organ za sprovođenje izbora koji je kao takav propisan Izbornim zakonom Brčko distrikta Bosne i Hercegovine, a nije pravno lice, te samim time proizilazi da ne postoji nespojivost funkcija shodno članu 5. stav (5), a u vezi sa stavom (8) istog člana Zakona o sprečavanju sukoba interesa u institucijama Brčko distrikta BiH.

Slijedom navedenoga, Komisija je donijela odluku kao u dispozitivu odluke.

POUKA O PRAVNOM LIJEKU:

Protiv ove Odluke nije dozvoljena žalba, ali se može pokrenuti upravni spor Osnovnom sudu Brčko distrikta BiH u roku od 30 dana od dana prijema Odluke.

Predsjednik
Komisije za odlučivanje o sukobu interesa

Admira Mujić, dipl. pravnik

Dostaviti:

1. Anonimnom podnosiocu
putem oglasne ploče,
2. Internet stranici Komisije,
3. Evidenciji i
4. Arhivi.